



17. juli 2013

UKA 2013/37

Inatsartut Suleriaasianni § 33 naapertorlugu Inatsisartuni aalajangiiffigisassatut siunnersuut imaattoq saqqummiupparput:

2014-mi atuutilersussamik Kangaatsiamiit Qaanaaq angullugu upernaakkut appanniarsinnaaneq 01. september-imiit - 29. februar-imut atuuttup, ukiukut sikuusarnera pillugu tamakkiisumik malitsinneqarsinnaanngitsup naleqqussarnissaa pillugu upernaakkut appanik piniarsinnaanerup maajip qeqqata tungaanut sivitsorneqarnissaanik, Naalackersuisut sulissuteqaqqullugit Inatsisartut aalajangiiffigisassaattut siunnersuut.

(ATASSUT-ip Inatsisartuni ilaasortaaitai, Siverth K. Heilmann aamma Gerhardt Petersen)

Tunngavilersuut:

Timmissat killilersugaasut ukiakkut ukiukkullu piniarneqarsinnaaneri malillugit inuussutissarsiutigalugu piniartunut amerlanerpaanik ullormut 30-t pisarineqarsinnaatitaapput, sunngiffimmili aallaaniartartunut ullormut tallimanik (5) pisaqartoqarsinnaalluni. Maannakkut timmissanik eqqissimatitsinermut inatsit atuuttoq malillugu avannaani 1. April tikillugu periarfissaavoq appanniartoqarsinnaanera. Tamaanga killeqartinneqarnerinut tunngavilersuutaavoq timmissat piffissap taaneqartup kingorna manniliulertarnerat.

Kangaatsiamiit Qaanaaq tikillugu avannaani ukiukut sikuusarnera pillugu, timmissanik piniarsinnaanermik periarfissiineq malitsinneqarsinnaanngilluinnarpoq, taamaalillunilu piniakkat pinngortitap nammineq illersulereertarpaai.

Avannarpasinnerusumi piniartuniit oqaatigineqartuutarpoq, pinngortitap allanngoriartuaanera pissutaalluni ilaatigut piffissap sivikitsup iluinnaani timmissanik pisaqartoqarsinnaasartooq aammalu upernaakkut sikuernerata kingorna aatsaat appat takkuteruttorfianni piniaqqusaajunnaartartut. Avannaani Upernaviup eqqaani avannaatungaani appaannaanngitsunik timmiarpassuaqarnera nungusaataanngilluinnartumillu piniarneqarsinnaasunik peqarluarnera piniartuniit oqaatigineqartuutarpoq.

ATASSUT-miit isumaqarpugut, appat upernaakkut avannamut manniliorfissuarminnut ingerlaarneranni maajip qeqqata tungaanut, assersuutitut piniartunit ullormut pisarineqarsinnaasut qulit (10) saniatigooralugu pinialuttartunit tallimanik (5) pisaqartoqarsinnaaneranik nungusaataanngilluinnartumik periarfissiisinnaasugut.

Puijorneqassanngilarmi taavani appat piniagaanerannut Inatsisitigut periarfissiineq sikuusarnera pillugu malinneqarsinnaanngimmat aammalu siunnersuummik saqqummiussatta siunertarinngimmagu peqassutsimut innarliinissaq, periarfissaq manna iluatsillugu timmissat allat soorlu mitit piniagaasarnerat ilanngullugu inatsisartuni Naalackersuisunilu nutaamik nalilersorneqarnissaa Atassut-miit kaammattuutigissavarput. Atassut-miit siunnersuuteqarnerput isigineqassaaq nunatsinni imminut pilersornerunissamat tapertassatut, pissutsinullu sumiiffinni pineqartuni naleqqussaanertut.

Timmissat piniagaasarnerat pillugu eqqartuisarnitsinni aamma taavani Upernaviup eqqaani appaqarfinni, Atassut-miit qangaaniilli oqaaseqaaterpassuit kisitsisoqarnissaanillu piniartut

ilisimasallit peqatigalugit kaammattuuteqartarsimavugut, taamaattumik misilittakkat eqqarsaatigalugit kissaatiginassanqeaaq, aalajangiiffigisassatut kingumut siunnersuuteqarnitsinni biolog-it kisitseqqaarnissamik kissaateqarlutik inatsisartunut Naalackersuisunullu kissaateqassappata.

Atassut-miilli ammaffigaarput nunatsinni nunattalu sineriaani timmissat piniarneqartartut ataavartumik nakkutigineqartarnerisa ingerlanneqartarnissaat.

Aningaasatigut allaffissornikkullu pisortanut kingunissaai:

Pisortanut allaffissornikkut aningaasartuutitigullu naleqqussaaneq annikitsuinnarmik kinguneqassaaq, tassalu inatsit, naqitallu suliareqqinneranni allaffissornikkut annertunngitsumik aningaasatigut kinguneqassammat.

Aningaasatigut allaffissornikkullu namminersorlutik inuussussutissarsiortunut kingunissaai:

Namminersorlutik inuussutissarsiortunut aningaasatigut allaffissornikkullu kinguneqassanngilaq.

Aningaasatigut allaffissornikkullu innuttaasunut kingunisai:

Aningaasatigut allaffissornikkullu innuttaasunut kinguneqassanngilaq.